

Saya berasa gembira tetapi sedih mengetahui tentang pencalonan Cik Halimah sebagai Speaker.



Beliau rakan yang mengagumkan di Kementerian Pembangunan Sosial dan Keluarga (MSF) dan saya sering meraih manfaat daripada nasihatnya yang berterus-terang. Beliau obor yang menjalankan tugasnya dengan tidak kenal erti penat dan minatnya yang mendalam. Rakan-rakan kerja dan saya sudah tentu merindunya. Saya juga ingin mengucapkan tahniah kepada Cik Halimah kerana pencalonannya sebagai Speaker wanita yang pertama. Saya lebih bersemangat kerana akan terus mempunyai peluang bekerja dengannya.

— **Encik Chan Chun Sing, Pemangku Menteri Pembangunan Sosial dan Keluarga.**

Saya mengucapkan tahniah kepada beliau dan berharap beliau akan terus cemerlang, sekali gus mengharumkan nama baik masyarakat yang diwakili.



— **Encik Masagos Zulkifli Masagos Mohamad, Menteri Negara Kanan (Ehwal Dalam Negeri merangkap Ehwal Luar).**

Walaupun beliau tidak boleh "menyertai" perbincangan di dalam Parlimen, Cik Halimah masih boleh membincangkan isu-isu yang dekat dengan hatinya di luar Parlimen. Lantas pencalonannya tidak seharusnya dilihat sebagai satu kehilangan.



— **Encik Abdullah Tarmugi, mantan Speaker Parlimen.**

Beliau merupakan pilihan terbaik kerana latar belakangnya (dalam bidang guaman dan sebagai AP penggal ketiga) dan kerana beliau begitu dihormati di kalangan semua Anggota Parlimen. Saya percaya beliau akan menjadi inspirasi bagi semua wanita di seluruh dunia.

— **Encik Zainal Sapari, Pengerusi Majlis Bandar Pasir Ris-Punggol, yang juga AP GRC Pasir Ris-Punggol.**

Namun kita juga akan "kehilangan" suara seorang pemimpin yang lantang dan saya berharap beliau akan dapat terus menyumbang kepada kesejahteraan masyarakat.

— **AP GRC Chua Chu Kang, Encik Zaqq Mohamad.**

Halimah calon Speaker yang disenangi ramai



DIUMUMKAN SELEPAS MESYUARAT: Perdana Menteri berkata beliau telah memberi taklimat kepada AP Parti Tindakan Rakyat (PAP) mengenai pencalonan Cik Halimah (gambar) sewaktu perbincangan di Dewan Parlimen tengah hari semalam dan mendapat sokongan penuh mereka. — Foto THE STRAITS TIMES

Oleh **AZAHAR MOHD**
 azahar@sph.com.sg
 dan **ERVINA MOHD JAMIL**
 ervinamj@sph.com.sg

BELIAU seorang yang berwawasan, berpandangan jauh dan memiliki perwatakan lembut tetapi tegas. Pencalonan Menteri Negara (Pembangunan Sosial dan Keluarga), Cik Halimah Yacob, sebagai Speaker Parlimen yang baru juga mencerminkan beliau mampu memikul tanggungjawab lebih berat walaupun beliau seorang wanita.

Cik Halimah iusa seorang individu yang dihormati Anggota Parlimen dan pihak-pihak berkepentingan dalam Dewan, selain bebas dan adil, menurut beberapa Anggota Parlimen (AP), pengamat politik, rakan-rakan dan juga pemimpin kesatuan sekerja, semalam.

Menteri Negara Kanan (Ehwal Dalam Negeri merangkap Ehwal Luar), Encik Masagos Zulkifli Masagos Mohamad, yang dihubungi semalam berkata masyarakat Melayu-Islam pasti berasa bangga dengan pencalonannya sebagai Speaker wanita pertama dan wakil masyarakat yang disenangi semua.

"Saya mengucapkan tahniah kepada beliau dan berharap beliau akan terus cemerlang, sekali gus mengharumkan nama baik masyarakat yang diwakili," katanya.

Mantan Speaker Parlimen, Encik Abdullah Tarmugi, berkata pencalonan Cik Halimah yang digambarkannya sebagai lembut tetapi tegas merupakan satu kebanggaan kepada masyarakat Melayu-Islam.

"Walaupun beliau tidak boleh "menyertai" perbincangan di dalam Parlimen, Cik Halimah masih boleh membincangkan isu-isu yang dekat dengan hatinya di luar Parlimen. Lantas pencalonannya tidak seharusnya dilihat sebagai satu kehilangan," jelasnya lagi.

Pengerusi Majlis Bandar Pasir Ris-Punggol, yang juga AP GRC Pasir Ris-Punggol, Encik Zainal Sapari, berkata pencalonan Cik Halimah merupakan pilihan yang terbaik.

"Beliau merupakan pilihan terbaik kerana latar belakangnya (dalam bidang guaman dan sebagai AP penggal ketiga) dan kerana beliau begitu dihormati di kalangan semua Anggota Parlimen.

"Saya percaya beliau akan menjadi inspirasi bagi semua wanita di seluruh dunia," ujarnya.

AP GRC Chua Chu Kang, Encik Zaqq Mohamad, pula berkata pencalonan Cik Halimah membuktikan bahawa Cik Halimah mampu memikul tanggungjawab yang lebih berat itu, walaupun beliau seorang wanita.

"Namun, kita juga akan "kehilangan" suara seorang pemimpin yang lantang dan saya berharap beliau akan dapat terus menyumbangkan kepada kesejahteraan masyarakat," tambah beliau.

AP GRC Nee Soon, Cik Lee Bee Wah, pula berkata pencalonan Cik Halimah merupakan satu kemajuan yang memberangsangkan.

Ketua Pegawai Eksekutif (CEO) Persatuan Ain, Encik Mohd Yusof Ismail, yang telah mengenali Cik Halimah selama lebih 10 tahun, pula berkata bakal Speaker baru itu seseorang yang berwawasan, berpandangan jauh, berperwatakan yang lembut tetapi tegas.

"Contohnya, apabila kami duduk berbincang dengan anggota Lembaga Persatuan Ain, beliau akan meminta kami memikirkan ke hadapan beberapa tahun, seperti untuk 10 tahun lagi, apakah yang akan terjadi kepada unit keluarga dan apakah rancangan yang boleh kita lakarkan bagi program-program untuk mereka.

"Selain itu, isu-isu mengenai keluarga, terutama anak-anak dan wanita begitu dekat dengannya," kata Encik Mohd Yusof.

Walaupun Cik Halimah mempunyai jawatan tinggi, beliau tidak malu atau ragu-ragu meminta pandangan orang ramai.

"Walaupun saya gembira Cik Halimah diberi jawatan ketiga tertinggi di Singapura, saya juga prihatin kita hilang suara seorang pejuang yang lantang membela nasib pekerja, wanita dan juga golongan perlu dibela," tambah beliau.

Cik Halimah menyertai politik pada 2001. Dalam pilihan raya tahun tersebut, Cik Halimah bersama pasukannya — Encik Lim Boon Heng, Encik Tharman Shanmugaratnam, Dr Ong Chit Chung (mendiang) dan Cik Yu-Foo Yee Shoon — mengalahkan Parti Demokratik Singapura (SDP) pimpinan Dr Chee Soon Juan dengan kemenangan 85 peratus undi.

Sebelum menyertai politik pada 2001, beliau menyandang pelbagai jawatan.

Antaranya termasuk menjadi Timbalan Setiausaha Agung NTUC, Pengarah Jabatan Perkhidmatan Guaman NTUC dan Anggota Badan Pentadbir, Persidangan Buruh Antarabangsa, yang bertempat di Geneva.

Cik Halimah juga pemenang Anugerah Jauhari Berita Harian/McDonald's pada 2001.

Suami Cik Halimah, Encik Mohammed Abdullah Al-habshiee, 58 tahun, seorang peniaga, dan mereka mempunyai lima anak berusia antara 22 dengan 31 tahun.

Dua anak mereka telah pun berumah tangga. Cik Halimah pula masih tinggal di flat Lembaga Perumahan dan Pembangunan (HDB) di kawasan utara Singapura walaupun beliau telah bergelar Menteri Negara.

Dalam temu ramah *Berita Harian* tentang motivasi hidupnya tahun lalu, Cik Halimah berkata sejak kecil lagi, kerana kesempatan hidupnya sendiri, beliau sedar bahawa mereka yang tidak berkemampuan memerlukan bantuan untuk memperjuangkan nasib mereka. "Bantuan yang mereka perlu tidak semestinya perubahan atau dasar yang besar. Kadangkala ia hanya bantuan kecil yang dapat membawa perbezaan besar kepada kehidupan penduduk," katanya.

Ketua Jawatankuasa Eksekutif (Exco) Tabung Amal Aidilfitri (TAA), Haji Nasir Aman, yang telah mengenali Cik Halimah selama lebih 30 tahun berkata Cik Halimah mempunyai kelebihan yang unik — sedia mendengar walau apa pun pandangan yang disuarakan.

"Walaupun apa pun pandangan yang diberikan kepadanya, Cik Halimah akan mendengar dan membangkitkannya sewaktu sidang perwakilkan dan kadang kala kepada Parti.

"Orangnya peramah, tidak sombong, berkarisma dan beliau sedia mendengar walaupun pandangan itu berbeza daripada pendiriannya.

"Sifatnya yang suka membantu dan tidak pernah menyakitkan hati orang lain walaupun beliau pendiri yang tegas," jelas Haji Nasir, yang pernah menyandang jawatan Penolong Setiausaha Agung Kesatuan Pekerja Industri BESI (MIWU) dari 1979 hingga 2008.

Pencalonan Cik Halimah sesuatu yang amat dibanggakan oleh masyarakat Melayu-Islam. Kejayaan seorang wanita Melayu bertudung menjadi Speaker merupakan suatu yang luar biasa," katanya.

Seorang pengamat politik yang juga profesor undang-undang di Universiti Pengurusan Singapura (SMU), Encik Eugene Tan, yang dihubungi, pula berkata beliau yakin sifat-sifat peribadi Cik Halimah seperti menegakkan keadilan, kebebasan dan ketegasan akan dibawanya sebagai Speaker baru.

"Latihan dari segi undang-undang, reputasinya sebagai seorang yang bebas dan adil dan kesediaannya bersuara akan diterima baik oleh Anggota Parlimen dari Parti Tindakan Rakyat (PAP), pembangkang mahupun Anggota Parlimen Dilantik (NMP).

"Beliau juga akan meniup kesegaran baru dalam perundangan Singapura, selain menjana minat terhadap AP-AP wanita di kalangan warga Singapura.

"Beliau juga boleh menjadi inspirasi kepada wanita yang ingin menimbangkan kerjaya dalam politik," ujar Encik Tan lagi sambil menambah bahawa pencalonan Cik Halimah, dari segi protokol, akan menjadikan beliau wanita berjawatan paling tinggi dalam sejarah Singapura.

"Namun, lebih penting adalah hakikat bahawa Cik Halimah merupakan seorang wanita yang memakai tudung.

"Ia memberi isyarat kuat bahawa tudung bukanlah penghalang kepada wanita Muslim memainkan peranan yang aktif atau memegang jawatan penting dalam Kabinet atau Pemerintah," tambahnya.

"Satu lagi simbolisme penting adalah kita kini mempunyai tiga kaum utama di sini diwakili dalam kedudukan penting dalam Pemerintah: Badan Perundangan (Melayu), Kehakiman (India), Ketua Negara, Ketua Pemerintah (Cina).

"Dengan pencalonan ini, ia membolehkan Perdana Menteri merealisasikan pelannya yang awal sebelum Pilihan Raya Umum 2011, untuk mencalonkan Encik Zainul Abidin Rasheed sebagai Speaker Parlimen," kata beliau.

CIK HALIMAH YACOB, 58 TAHUN

PENDIDIKAN
 1961 – 1971: GCE Peringkat 'O' (Sekolah Perempuan Cina Singapura)
 1972 – 1973: GCE Peringkat 'A' (Sekolah Perempuan Tanjong Katong)
 1974 – 1978: Ijazah Sarjana Muda Undang-Undang (LLB) (Kepujian), Universiti Singapura
 1999 – 2001: Sarjana Undang-Undang (LLM), Universiti Nasional Singapura

KERJAYA
 1978: Menyertai NTUC sebagai pegawai undang-undang
 1992: Dilantik sebagai Pengarah Jabatan Perkhidmatan Guaman NTUC
 1 April 1999: Dilantik sebagai Pengarah Institut Pengajian Buruh Singapura (Sils)
 1 Mei 1999: Dilantik sebagai Penolong Setiausaha Agung NTUC
 7 Jun 1999: Dilantik sebagai Anggota Timbalan Lembaga Memerintah Pertubuhan Buruh Antarabangsa (ILO), menjadi wakil pekerja Singapura pertama dipilih untuk menduduki lembaga yang berpusat di Geneva itu

ANGGOTA PARLIMEN
 3 November 2001 – 19 April 2006: AP GRC Jurong
 27 April 2006 – 18 April 2011: AP GRC Jurong
 7 Mei 2011 – kini: AP GRC Jurong

MENTERI NEGARA
 21 Mei 2011 – 31 Oktober 2012: Menteri Negara (Pembangunan Masyarakat, Belia dan Sukan)
 1 November 2012 – kini: Menteri Negara (Pembangunan Sosial dan Keluarga)

ANUGERAH
 2001: Penerima Anugerah Jauhari Berita Harian/McDonald's